



看醫生敢著愛食藥

有一句俗語講：「求神明就有毋著，看醫生著愛食藥。」前一句話我相信，若是無代無誌，大概無人會去求神問佛。毋過若講著看醫生著愛食藥，彼就無一定。

前一站仔，一位朋友講我最近記持若像怪怪，敢會是有老人痴呆的症頭。我想講嘛有歲矣，有需去檢查一下，就去請教一位熟似的醫生。伊共我問問看看咧，就叫我先去抽血檢查，另外安排做『核磁共振』的檢查，一禮拜後才去看結果。好哩佳哉，結果是無啥物重耽，毋免食藥仔。

這予我想起細漢蹣跚庄跤所在，阮遐兩個庄頭，無甲半个醫生。若有人破病，干焦會當提人寄藥包仔的藥仔來食，抑是去予一个蹣過藥局的赤跤仔先看，食伊開的藥仔。有時陣嘛會聽人講，就家己去買藥仔來食，若好運食會好，敢會有副作用就慳講矣。會記得我欲考大學彼當陣，腹肚邊生一粒癰仔，姑不將就聽人的話，去買一粒美國仙丹 *auromycine* 來食，佳哉無發生啥物問題。

差不多成十年前，我因為感冒鼻仔發炎，去病院予醫生看，提藥仔轉來食，想袂到食了吐閣落，拄起先想講是食歹腹肚，毋過煞一擺比一擺較嚴重，到食第三擺藥仔了，煞起烏暗眩，人強欲曲去。緊予人送去病院急診，結果講是對內底有一粒治消炎的抗生素 *cephalosprins*（『頭孢子素』）過敏，醫生講好佳哉是用食的，若準是用注射的，無定著命會無去。就按呢，我全部的病歷表攏有記載這款藥仔會過敏。這嘛予我想起有兩個朋友恰我全款症頭，去予個真熟似的醫生看，有可能是想欲予病較緊好，共個注射，無料著煞予個真緊就轉去。

咱人的身體是真奇妙的，每一個人的基因攏有無全的所在，對食品恰藥品的反應嘛無相碼。有真濟人會聽人講食啥物會補身體，抑是會治啥物症頭，其實攏是無定著的。咱人對食物恰藥仔嘛會有無全的反應恰副作用。無論是用食的、抹的抑是用注射的，攏全款會反應，干焦是緊恰慢的精差。服藥若欲用注射的，有時會較緊好，嘛有可能會較緊轉去。

總是，去看醫生無一定著愛食藥仔，服藥著愛誠細膩，毋是用抹的就無代誌，用注射的病就會較緊好，正確的觀念是真重要的！

作者：陳憲國

☆詞彙學習☆

【有歲矣】：ū-huè--ah，年歲已長。

【好哩佳哉】：hó-lih-ka-tsà，好在。

【重耽】：tîng-tân，異常，出了差錯。

【赤跤仔先】：tshiah-kha-á-sian，無牌密醫。

【癰仔】：ing-á，一種惡性膿瘡。

【姑不將】：koo-put-tsióng，不得已。

【轉去】：tńg--khì，死掉。

【無定著】：bô-tiann-tiòh，不一定。

【總是】：tsóng--sī，總而言之， 不管如何。